

Zeitschrift: Annalas da la Societad Retorumantscha

Herausgeber: Societad Retorumantscha

Band: 71 (1958)

Nachruf: In memoria da cussglier naziunal Jon Vonmoos

Autor: Gaudenz, Nicola

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

In memoria da cussglier naziunal Jon Vonmoos

da Nicola Gaudenz

Cun Jon Vonmoos ha tut cumgià da la vita publica in Engiadina ed in nos chantun Grischun üna persunalità cun bleras e profuondas ragischs aint in nos pövel, chi merita da gnir manzunada eir aint illas Annalas. Jon Vonmoos ais nat ils 10 gün 1873 sco figl da Not Andri Vonmoos ed Uorschla, nada Bardola. Divers fradgliunzs murittan fingià in giuvn' età. Be seis frar Schimun creschit sü cun el e dvantet plü tard per blers ans il cuntschaint ravarenda da Ramosch. Quaist ultim ais stat eir ün scriptur e poet ladin da granda reputaziun.

Jon Vonmoos passantet ün'infanzia allegra e paschaivla, frequen-
tet las scoulas cumünalas a Ramosch ed entret davo al gimnasi da la
Scoula chantunala a Cuoir. Grand plaschair avet el da pudair tour
part a la festa giubilara da 150 ans Scoula chantunala l'utuon da
l'an 1954. El sarà stat ün dals plü vegls partecipants a quaista festa
chi han frequentà in lur giuentüm nossa Scoula chantunala. Davo
absolt l'examen da maturità, l'an 1892, as dedichet el al stüdi giu-
ridic. El stübget a las universitats da Turich, Heidelberg, Berlin e
Berna. El ais stat ün student dalettaivel e da bler umur. Dapertuot
avaiva el ün grand numer da cuntschaints e buns amis. Amo in età
avanzada quintaiva el cun plaschair da seis sogiuorn a Berlin. Quella
vouta eira l'università da Berlin üna da las plü cuntschaintas in Eu-
ropa, e specialmaing la facultà giuridica quintaiva tanter las plü im-
portantas cun ils meglers e celebers professers da reputaziun mun-
diala. Per glivrar seis stüdis turnet el a Berna, ingio ch'el avaiva fin-
già cumanzà la lavur vi da sia dissertaziun. Ma dandettamaing, l'an
1897, gnit Jon Vonmoos elet president dal *Circul da Ramosch* ed a
l'istess temp deputà al Grand Cussagl. In quaist mumaint ha Jon
Vonmoos stuvü decider üna dumanda per el fich importanta e deci-

siva, nempe quella da glivrar seis stüdis cun il doctorat opür sieuer al clam dal pövel da seis circul. El as decidet d'acceptar la clamada da seis convaschins e desistit a l'examen da doctorat. Uschè dvantet l'an 1897 per Jon Vonmoos il cumanzamaint d'üna carriera politica briglianta sco chi as po registrar be pro pakischems homens da nos chantun. Blers ans ha el servi al Circul da Ramosch e prestà tuot dischinteressadamaing blera lavur per il bainstar dals cumüns e lur abitants. A l'istess temp ha el manà ün büro d'advocatura, na forsa per tscherchar scumpigls e guadagn, ma per güdar e dar buns cussagls a tuot quels chi as volvaivan ad el. L'advocat Jonin Vonmoos eira cuntschaint e retscherchà perche ch'el nu vulaiva promover process, dimpersè schoglier las questiuns e differenzas in maniera amicabla. Quaist correspuondaiva tuottaffat a seis esser e caracter.

Al *Grand Cussagl* ha el fat part dürant 50 ans, dal 1897 fin al 1946. Duos jadas, nempe dal 1908 e 1937, ais el stat president dal Grand Cussagl. Quaista onurificaziun extraordinaria ais statta concessa ill' istorgia da nos chantun be a pacs homens prominent. Tanter quaists chattainsa: Cussglier da Stadis Peter Conradin Planta, chi füt president dal Grand Cussagl i'l ans 1850 e 1853; güdisch federal Andrea Bezzola: 1875, 1878, 1880, 1888, minister Alfred Planta: 1893 e 1897; cussglier federal Felix Calonder: 1896 e 1899. Chi chi sföglia aint ils protocols dal Grand Cussagl ha occasiun d'admirar la grand' actività da Jon Vonmoos. El cugnuschaiva tuot ils differents departamaints ed as partecipaiva a la discussiun da quasi mincha dumanda chi gniva trattada aint il cussagl. Id ais cler, ch'ün deputà uschè profuondamaing versà illas differentas materias publicas gniva elet adüna aint in bleras cumischiuns chi avaivan da preparar las chosas per il cussagl. D'üna quantità da cumischiuns importantas ais el stat ün excellent president. Jon Vonmoos ais eir stat l'iniziant da la ledscha da sgüranza cunter ils dans elementars. Quaista ledscha bunifichaiva da principi be dans elementars vi da terrains da culturas. Plü tard alura ais la ledscha gönüda schlargiada, uschè ch'hoz vegnan bunifichats eir dans elementars invers chasas e stabilimaints. Che buns früts cha quaista ledscha porta a la populaziun da nossas valladas muntagnardas san da güdichar quels chi han gönü la disfur tüna da subir dans tras auazuns, lavinas o incendis. —

Dals 1. schner 1915 fin als 30 avrigl 1920 ais stat Jon Vonmoos commember dal *Pitschen Cussagl*. El surpigliet la direcziun dal De-

partamaint da l'intern. Quaist departamaint al staiva il plü a cour, perche Jon Vonmoos manaiva svessa a Ramosch üna grand' agricultura e restet dürant tuot sia vita ün fidel ami e promotur dals paurs. Sco schef dal Departamaint da l'intern ha el tscherchà da lavurar e promover sün tuot la lingia il bainstar da nossa pauraria. Grands pis-sers al portet la zoppina chi as deraset epidemicamaing tras las valladas da nos chantun. El tscherchet insembe cun il veterinari chantunal Isepponi da cumbatter quaista terribla magagna cun tuot ils mezs pussibels, as tgnand tschertamaing adüna vi da las prescripziuns legalas. Bricha tuot ils paurs nun eiran perinclets cun las masüras decretadas. Ma il departamaint e l'uffizi da veterinari chantunal stu-vaivan executar las ledschas in vigur e tour masüras severas per pudair far frunt ad ün' epidemia maligna chi portaiva grands dans a nossa puraglia. Ils ans cha Jon Vonmoos ais stat schef dal Departamaint da l'intern eiran quels da la prüma guerra mundiala chi portettan a nossas autoritats t. o. eir greivs problems per il provedimaint da la nudritüra dal pövel. Quella vouta nu disponiva nossa Svizzra d'uschè grandas reservas sco cha que ais il cas hozindi. I mancaiva tuott' experienza sün quaist champ, uschè cha las difficultats eiran enormas. Jon Vonmoos as det granda fadia da's deliberar uschè bain sco pussibel da quaist' incumberza al böñ da nos pövel.

L'an 1919 ais Jon Vonmoos gnü elet dal pövel grischun commember dal *Cussagl naziunal*. Quaist' elecziun seguit per la prüma vouta in applicaziun da la nouva ledscha federala dal proporz. Da quaist an davent ais el adüna gnü reelet onurificamaing dal pövel grischun sco cussglier naziunal, fin l'an 1946 ch'el as retret our d'aigna volontà causa età avanzada. Aint il Cussagl naziunal ha Jon Vonmoos sviluppà üna grand' aktività. El eira ün politiker cun grandas cugnus-schentschas da las materias, da temparamaint e grand' energia, excellent oratur e da caracter nöbel. Tuot quaistas qualitats al permettentan da sviluppar aint il Cussagl naziunal, ingio ch'el as rechattaiva propcha in seis elemaint, üna granda aktività. El ais stat commember e president da bleras cumischiuns importantas, sco p. ex. da la Cumischiun sindicatriza, da finanzas, dal dazi, sco eir da l'importanta cumischiun per il schlubgiamaint dals debits paurils. Cur cha'l Cussagl federal avaiva propost l'an 1936 a las Chambres federalas da strichar sün tuot la lingia las subvenziuns dal stadi, as ha cussglier naziunal Jon Vonmoos dostà sco ün liun e cun success per salvar la

subvenziun al chantun Grischun per la fabrica da sias vias. Güst' in quaista debatta as demusset Jon Vonmoos sco politiker dad otas qualitats, perche tant il Cussagl federal sco prominents commembers dal Cussagl naziunal (p. ex. Emil Keller, d'Argovia) defendavaian l'oter püt da vista. Davo lungas debattas ha però Jon Vonmoos guadagnà la battaglia, que chi füt per nos chantun Grischun da grandischma importanza. Adüna ha el defais ouravant ils interess da l'agricultura. Perque ais el eir stat ün collavuratur intim dal cuntschaint cussglier naziunal Baumberger chi avaiva cun sia moziun provocà diversas acziuns federalas a prô dal bainstar da la pauriglia muntagnarda. Jon Vonmoos ha eir fundà il Club pauril da las chambras federalas ed ais stat 20 ans seis president. A quaist club fan part deputats da tuottas duos chambras e da tuottas fracziuns. In quaist gremium important ha el gnü favuraivla occasiun da far valair si' influenza per las chosas chi l'occupaivan.

Eir lingua e cultura rumantscha staivan a Jon Vonmoos a cour. Sco seis frar Schimun Vonmoos ais el adüna stat ün fidel figl da sia lingua materna ed ha adüna tscherchà da sustgnair e promouver il rumantsch. L'an 1920 avaiva la Lia Rumantscha dumandà per la prüma jada üna contribuziun federala. Il Cussagl federal avaiva propost ün import da fr. 2000.— l'an. Quaista proposta eira brav mai-gra. Jon Vonmoos tgnét aint il Cussagl naziunal ün discours fulminant, citand eir divers poets ladins e discurrind svessa cun pleds sonors ed impreschiunants rumantschs, cul success cha'l Cussagl naziunal e davo eir il Cussagl da stадis decidettan da dar üna contribuziun annuala da fr. 10 000.—.

Cussglier naziunal Jon Vonmoos ais stat eir blers ans commember da la suprastanza da la *Società agricula federala* ed ha collavurà specialmaing cun il cuntschaint secretari pauril svizzer, prof. Laur. Amo ils ultims ans da sia vita avaiva el correspundenza cun prof. Laur. Jon Vonmoos ais stat eir blers ans president da la SELVA, società chantunala dals productuors da laina. Per promouver il schmertsch da la laina chi plü bod nun eira adüna uschè facil ha el inoltrà l'an 1935 aint il Cussagl naziunal ün postulat chi avaiva per mera la fundaziun d'üna fabrica per l'üsafrüt economic da la laina. I resultet alura la fundaziun da la HOVAG a Domat, chi fin al 1956 ha cumprà laina in grandas quantitats, specialmaing quella chi nu po gnir dovrada per fabrica. Jon Vonmoos ha eir manà cun success la

Società agricola chantunala, da la quala el ais stat president dal 1925 fin als 1940.

Cussglier naziunal Jon Vonmoos nu s'ha be occupà cun dumandas e problems da noss' agricultura. El ha eir adüna tscherchà da promouer il trafic, bain saviand cha güsta quaist ais ün ferm pilaster da l'economia publica da nos chantun Grischun. Sco successur da cussglier federal Calonder ais el gnü tschernü l'an 1906 aint il *Cussagl administrativ da la Viafier retica*. Qua restet el fin l'an 1952. Dal 1939 fin 1952 ais el stat president da quaist cussagl. Dürant il temp da si' operusità aint il Cussagl administrativ da la Viafier retica ha el pudü vair cha quaist' impraisa da trafic ha gnü al principi ün directer, da 1909 davent *trais* e daspö 1918 darcheu be *ün*, nempe Gustav Bener. Cun tuot sias forzas tscherchet el adüna da promouer nossa Viafier retica. Ils temps da crisa e da guerra portetan grangs pissers per las autoritats da nossa Viafier retica. Las relaziuns finanzialas dvantettan adüna plü seriusas, uschè cha's stuvet volver vers la Confederaziun per agüd. Suot la presidenza da Jon Vonmoos füttan fattas las grandas instanzas per il sustegn federal chi avettan per conseguenza cha la Confederaziun schlubget ils impraiats dal chantun vers la Viafier retica illa somma da 43 milliuns. Tschertamaing cha quaist agüd federal ais bel e sto gnir arcugnuschü. Ma el nu das-cha esser la fin da l'agüd dumandà. La fin da l'agüd federal stat inizià suot Jon Vonmoos subentrarà pür cur cha la Confederaziun surpigliarà la Viafier retica per l'incorporar a las Ferrovias federalas. Manzunain cha eir la fusiun da las viasfier Cuoira—Arosa, Bellinzona-Mesocco e Bernina cun la Viafier retica subentret suot il presidi da cussglier naziunal Jon Vonmoos.

Davo cha cussglier naziunal Jon Vonmoos translochet seis domicil da Cuoira a Ramosch al gnit surdat la presidenza dal *Güdisch districtual En*. Eir da quaist' incumbenza as dischimpegnat el cun maeustria. El s'ha adüna dat fadia da tscherchar il dret material e la güstia.

Ün sguard sün l'attività da cussglier naziunal Jon Vonmoos demuossa ch'el ha gnü in sia operusità publica ün success tuot special. La clav da quaist success ais da tscherchar illas qualitats e virtüds cha quaist hom popular avaiva. Sia intelligenza e sia educaziun spiertala al pussibiltettan da s'ocupar facilmaing cun tuot las chosas dal stadi. Ma el eira eir ün hom real e tolerant. Perquai gniva el eir adüna

stimà dals convaschins in Samignun, per ils quals el as prestet adüna cun grand' amur. La bella via d'access da Vinadi in Samignun ais bain per buna part d'attribuir a las fadias da Jon Vonmoos. El avaiva eir blers amis da l'otra confessiun, dals quals vögl manzunar be duos, nempe pater Maurus Carnot barmör e cussglier naziunal dr. J. Bossi barmör.

Cussglier naziunal Jon Vonmoos avaiva virtüds specialas, nempe quellas da la *buntà* e *bainvuglientscha*, *vardaivlezza* e *sincerità* e da la *fidelità*. Seis far e demanar eira adüna guidà da la buntà, ed el eira cuntaint schi gaiava bain a seis vaschins, cumpatriots ed amis, per ils quals el avaiva adüna granda bainvuglientscha. In sia operusità eira el adüna vardaivel e sincer. El eira avert e gaiava la via gualiva. Sur tuot al staiva la fidelità. Fidelità vers sia persvasiun, fidelità vers seis pövel e sia patria in temps quiets e burrascus, fidelità invers seis amis. Sch'el staiva aint per ün ami our da persvasiun schi nu'l laschaiva el in imbarraz eir schi subentraivan obstaculs e difficultats. Que sun virtüds chi han dat al politiker Jon Vonmoos il *buol da nöblezza*, e pelvaira as po dir d'el ch'el ais stat ün hom da *nöblezza da spiert* e *nöblezza da cour*.

Quaistas qualitats e virtüds han laschè sviluppar a Jon Vonmoos d'ün hom politiker ad ün vair *hom da stadi*, i'l sen sco cha nus il cugnuschain our da l'istorgia da la Grezia classica. Que sun homens da stadi chi as praistan in lur vita dischinteressadamaing, lavurand cun üna mera, nempe quella da güdar ed operar per il bainstar da tuot il pövel. Perque ais stat Jon Vonmoos ün hom bainvis dapertuot e stimà da tuots. El eira ün hom da stadi popular. Las portas al eiran dapertuot avertas. Specialmaing a Berna pudaiva el entrar aint illas chasas da tuot ils cussgliers federals e'ls directers da lasgrandas administraziuns federalas. Tras quaistas relaziuns amicablas ha el pudü obtgnair grand success per tuot las chosas ch'el defendaiva. Però eir sias portas a Ramosch eiran avertas. Tuot ils cussgliers federals ed otras personas prominentas chi as rechattaivan in vacanzas in Engiadina o contuorns gaiavan sgüramaing a Ramosch per salüdar al stimà e venerà ami Jon Vonmoos. Eu vögl nomnar be ün pêr da quaists, nempe ils cussgliers federals Motta, Musy, Häberlin, Stampfli, Minger, v. Steiger, Kobelt, cussglier da Stadis Schöpfer e. o.

Sco già manzunà ais stat cussglier naziunal Jon Vonmoos insembel cun seis frar Schimun Vonmoos adüna ün grand ami da nossa

lingua e cultura rumantscha. L'an 1938, davo cha'l pövel svizzer ar-cugnuschet la lingua rumantscha sco quarta lingua naziunala, ha Jon Vonmoos in divers discours cità ün grand filosof chi ha dit: «La lin-gua materna ais l'orma d'ün pövel.» Il pövel rumantsch, l'Engiadina e'l chantun Grischun han tuot motiv d'esser grats a Jon Vonmoos per tuot que ch'el ha prestà in sia vita a prô e böñ da la patria e dal pövel.

Cussglier naziunal Jon Vonmoos ha gnü la furtüna da giodair dü-rant tuot sia vita fich buna sandà. Amo cun passa 80 ans as rechat-taiv' el in bunas condiziuns da sandà e s'interessaiva per tuot que chi passaiva in sia patria ed aint il muond. El eira arrivà a strusch 83 ans cur ch'el gnit assagli d'üna malatia maligna chi stüdet sia vita al principi da marz 1956. Sias spoglias mortalas gnittan surdattas a la terra sül sunteri da Tschanüf. Üna granda comitiva funebra ac-cumpagnet il defunt a l'ultim repos. Dasper als blers amis e cun-tschains d'Engiadina e d'utrò as pudet constatar eir la preschentscha d'üna delegaziun ufficiala dal Pitschen Cussagl, plünavant il presi-dent dal Cussagl administrativ da la Viafier retica, rapresentants da las Ferrovias federalas e dal Secretariat paüril svizzer, scopür da las societats da students Renania ed Utonia.

Cun Jon Vonmoos ais parti our da la vita publica da nos chan-tun Grischun üna persunalità da granda influenza ed importanza. Seis grands merits per patria e pövel restan incontestabels. Nus avain tuot motiv da mantgnair il trapassà adüna in meglra memoria.